

小方壺齋

小方壺齋

使滇紀程

六安楊懌曾著

道光十年四月二十二日奉○○命派往黔滇鞫獄閏月初一日由京啟程同使者爲鍾仰山少寇今調任少宰昌偕往者則比部郎中王紫瀾端微熊介臣一本員外郎瑞蓉塘元儀部主事麟月舫桂也是日五鼓大雨黎明漸疏已刻出城天氣晴朗

初四日抵保定夜大雨啟行時雨竟止自定州以南因前月久雨大路水溢肩輿紆道而行頗形滯滯至內邱縣署令爲門生曾貫之送至圓津庵距城二十里庵爲桐城方恪敏公微時養疴處後官制軍重加修葺亭臺池樹花木燦然可觀有方公祠在焉庵中名公卿題詠甚多皆刻石嵌壁上晚抵順德府城南入館舍雷雨交作旋止次日至廣平府臨洛驛以臨洛河而名唐時曰洛州邯鄲縣有呂公祠南關外有宋璟墓至磁州過漳河至豐樂鎮入河南彰德境府南門外有來鶴樓未詢所自過湯陰縣城謁岳武穆公祠縣北二里許有廣靈王扁鵲墓豐碑特立二十餘里有古大賚處至高順橋河流瀾瀾白石鄰鄰已在淇泉左右間矣衛輝府近城十餘里有比干墓時因勘驗蘭儀濠工由封邱轉至蘭儀

十七日始抵汴省住大相國寺館舍中

二十日酉刻地微動卽止繼聞河北安陽延津臨漳等縣先後馳報地震狀有城垣衙署傾圮者戴方伯宗沅親往查勘撫卹請發庫項十餘萬兩可謂知卹民者

五月初九日接刑部咨文飭知介臣比部丁艱回籍余等公事已畢於十五日卯刻啟程行抵尉氏縣成刻接滇撫伊莘農同年公文咨會全案人證業已提省至洧川境道旁有碑書呂蒙正養晦處有東里坊國大夫祠許州城南八里有灞陵橋襄城縣北廿里有季子挂劍處葉縣途中有沮溺耦耕石坊子路問津碑裕州道旁有搬倒井爲漢光武遺蹟有光武廟旁有暢園花木池樹甚佳由南至呂偃驛入楚北界

抵樊城一宿次早過襄江

六月初一日至荊州郡城晤徐秋潭將軍光栗原觀察王可愚太守是日住試院景韓堂乃余視學時李
霽嵐明府新構余爲題額因公安澧州驛路水溢有司請改舟行次日在栗原觀察署中約秋潭可愚小
敘俟船隻齊備卽於酉刻登舟時府學訓導王際霍來見乃余入學並拔貢○朝考閱卷所取士也江陵
孝廉黃名前拔貢鄧承緒捐訓導黃傳前鄧貽善陳輝章陳鳳章生員楊學源楊心源鄭本勳武解元姚
步瀛滿營孝廉三多德克七品京官福瑞俱來見皆余科歲試入學生也並有滿營承瑞成祥係余拔入

武學者均已得五品官於將軍都統署中一見猶識其人次晨過江入太平口內河由公安澧州境行沿
途水漫兩岸居民俱在水中支棚架席露處炎蒸殊堪憫惻因各縣矜耆呈請勘驗當卽批發荆宜施道
飭縣勘驗詳報卽於是日戌刻具摺入奏入安鄉境漫溢尤甚兩岸俱被淹沒晚泊柳林叢密處不知其
爲何所也入武陵縣境兩岸略覺分明過牛皮灘直抵常德郡城此次潯暑舟行同事者頗生疑懼及開
船後忽遇順風六日而至實出望外自常德郡由驛前行至桃源過白馬渡劉禹錫詩白馬湖平秋日光紫
菱如錦彩鷺翔卽此地也連日天氣酷熱異常夜行尙覺清涼道中山路已多平坦處田禾正茂惜月光
尙微燈火閃爍一路水光山色未得領略耳過此入辰州境仰看辰龍關峰巒壁立土人謂爲豹子崖肩
輿須用繚行幸由山麓紆折迴環而上尙不覺險至沅陵界亭驛辰刻大雷雨半月來潯暑薰蒸得此稍
減館舍旁有伏波宮昔馬援征五溪蠻卽在辰沅境內也由清捷塘過馬鞍獅子各汛皆以山得名崇山
峻嶺有二三高坡視前此爲較長矣由沅州府過河經晃州驛入黔省玉屏縣境至鎮遠郡城沿河山徑
險仄人馬難於駐足鎮遠爲黔省門戶城外大橋題曰滇黔道岸倚城有三元洞樓閣宏敞長橋映帶下
臨溪河卽爲舟楫可通之處過文德閣俗名油榨關兩峰壁立一綫可通有兩坡對立三重迭起中阻小

溪行者紆回曲折幾至十餘里而墩臺相望招呼可應名爲相見坡又有望城坡路亦峻削距施秉縣城十里望之如在咫尺過施秉十里道旁有華嚴洞中有天然大士石像儼如雕琢至飛雲巖勢若雲垂玲瓏奇絕亦有生來大士像坐以蓮臺近爲人飾以金碧反失天然妙相凡龍虎獅象之形俱石乳滴成多彷彿肖之有聖果亭翼然臨於其上飛泉潺湲漱玉噴珠聲聞洞外下有月潭寺松竹環繞獨幽勝相傳有王陽明碑記今已無存黃平州四十里外有大風洞一名雲溪洞卽古道書所謂時蒼洞天也中有蒼龍白虎石鐘石鼓之形入數武寒氣逼人不敢前進洞上有小洞拾級而登從小洞口轉入有亭特立又循木梯而上佛殿三間足供遠眺相傳洞口通楊老溪與平越接壤蓋深至三十餘里矣聞向來遊迹罕到余與仰山少宰攝足同登覺瞶目之餘眾山環拱亦遊覽之勝境也至楊老驛過魚梁江兩巖對聳下有石橋溪流激湍亦自可觀入貴定縣境有牟珠洞一名憑虛洞在大道旁洞口石柱圓直下垂上有一穴得見天光數步內須然炬而行泉水自旁石罅中流出聲如雷鳴有鐘鼓獅首象鼻之形亦彷彿似之

七月初三日至黔省貴陽首都城環九里自南至北街道平闊市肆羅列不覺在萬山中矣蓋自桃源二十里卽多山路歷辰沅至玉屏入黔境峭壁巉巖溪流泉湧指不勝屈所過鄉城村市男婦大小觀者如堵視其廬舍衣履已可想見地瘠民貧之概而沿途松杉竹柳樓欄桐梓之屬青蔥鬱鬱茂正復不少土物所宜資以爲利殆天之所以養斯民也其民知習勤苦每遇兩山之間稍爲平衍卽治田種稻不使略有曠土依山結廬者多係苗寨山麓周環皆治爲田畛隰分明層層疊疊幾無餘隙省城東三里許有雪崖洞廟宇宏敞中有石洞現觀音大士像上有呂祖閣由洞而入有文昌閣王文成公祠諸葛武侯祠下有清澗亭延翠閣清流環繞遠峰對峙桐梓松竹之屬葱蔥鬱鬱頗有可觀城南里許有涵碧潭水入南明

河越浮玉橋上釣鼇磯有甲秀樓巍然特立樓前有鄂西林相國平南銘功鐵柱雍正年建鑄又有勒制府保鐵柱中有涵碧亭對面東山簷翠白水環流左武侯祠右維摩閣西林相國亦建祠於其旁洵屬黔垣勝境西南有黔靈山層岫疊出樹木叢濃循石磴盤曲而上約百餘級始躋山之巔曲徑通幽忽然開朗最高有觀音殿其餘僧舍客堂俱屬潔靜四圍竹林甚茂松杉滴翠桂子流香黔省靈秀之氣實鍾於此山巔有小亭乃仰山少宰尊甫閣學公官廉訪時所建題曰小雲棲亭中小憩林木清華正不減浙西幽勝也後五里許有泉名曰聖泉又曰百盈泉雖大旱時亦不見涸距會城三十里至龍場相傳有陽明洞未詢所在清鎮縣故威清衛地山多尖峰四面橫列與前此之層巒疊嶂不同有龍井驛井在路旁沿途石塊頗有雲狀亦一奇也安平縣山形又多圓峰四圍環繞中多稻田有橋俗名水橋泉水分流浸灌田畝滔滔不絕安順府城環九里園市居舍皆宏敞佔人雲集較勝省垣聞昔曾議立省會於此因稱土輕於貴陽故舍此就彼以余觀之貴陽山多靈秀而氣聚安順地勢開闊而氣散自不僅以土之輕重有差也前明設普定軍民使以襟帶三州其權甚重今附郭爲普定縣移提督駐此殆黔省要害之地也鎮甯州本安莊衛地行五里有觀音洞洞中有大士像又名雙明洞東西兩洞口如城門石乳下垂空闊高朗旁有潭淵深莫測其水味鹹殆所謂海眼歟又二十里至白水河石磴中橫急湍層疊折入西去過白虹橋聲如奔雷舊有望水亭新建敞樓三間尙未落成面對瀑布於懸崖數仞上怒濤噴湧雪練飛灑形若擘絮勢如翻綿細似珠簾蟲比冰柱聯貫絡繹萬斛傾倒而下注潭水輕紋漾綠寂然不動上下相激成煙霏霧結之狀殊不可解相傳潭內有水犀風清月皎之時往往出見潭水深不可測故瀑布由石壁上奔流激湍而下晝夜不息而潭水滿而不溢下流勢緩而聲細也對岸石壁題雪映川霞四字旁有碑記爲秦王睿作未考爲何時人也由石龍關至郎岱廳亦有高坡尙不甚長至打鐵關山形突兀石磴盤

折而上越十餘里之遙道尙寬平不自知其已在山之巔也紆回而下勢頗陡峻爲拉帮坡幾廿餘里懸巖峭壁輿夫難以駐足至毛口過河其水爲盤江上流相傳舊道由盤江鐵索橋大關索嶺行更爲險峻自雍正年間改由郎岱較爲稍平阿都田爲安南縣境巒岫稠疊亂峰插天雲山形又爲一變至花貢遠望高峰雄翠氣挾飛動有挾雲凌霄之勢輿夫曰此老鷹崖也行七里至花市又八里由小坡紆回而進逾石橋繞長澗石級千盤又數里而爲丁寨方抵老鷹崖脚下幸天氣晴朗雲霧悉開而峭壁猶爭愈轉愈峻直至崖頂而止回視前此之層巒疊嶂皆若培塿而人蹤馬迹如蟻隨磨旋屏氣息聲莫不搖精動魄從此下坡不過里許卽履平地可見過此以往所謂平曠之地與萬仞之山相齊而地勢爲極高矣至百里外有南澗坡上下不過十里石級寬平輿馬易行亦資孔山勢漸低爲黔省末站至滇南勝境卽入雲南界路旁有石虬亭康熙年間巡撫郭璵建以亭前有石長二丈許其形似虬也舊有石龍古寺今廢道左有大木坊書忠孚化成四字爲鄂西林相國立平彝縣城南二里許有清溪洞宏敞如廣廈雲峰下垂皆石乳融結而成多有天然佛像中有泉水湧流詢知後十餘里爲紫泉洞蓋亦資孔以南土色皆紫不獨茲泉爲然過此山勢漸平而迤邐凸凹亦不見十分坦曠四顧土坡高下絕無林木之勝依山開田亦少可見滇民不若黔民之能習勤苦焉至霑益州舊交水地以兩水相交故也晚止州署中北窗倚眺平野四闊青疇萬頃煙樹朦朧遠山環帶頗似吾鄉風景憶自道經辰沅以來忽然改觀矣過石板河至馬龍州城道旁有忠勇異象石坊相傳前明水西安氏叛率眾犯州陶土司禦之陶有一象暮伏山洞中鼻吸泥水數斛突出直抵賊壘噴水跳躍捲一賊擲空中墜死眾大駭土司乘勢逐賊遂大捷及晚見象中毒弩而斃土人德之葬於南山曰義象冢過下板橋至小關索嶺古木密所也史載諸葛亮盟南人於木密卽此上有關索廟顧祖禹方輿紀要云諸葛武侯遣李恢關索分道南征恢以功封亭侯關索爲漢

壽亭侯少子勳勞尤著土人至今祀之馮再來滇考所云亦同或謂關索即關興者非也廟前有武侯手植古柏又有一銅馬相傳爲唐時物至此回視黔省諸山俱在足下矣尋甸州大鼎山有海潮寺登觀音閣俯視秀崧湖青疇白水激灩空明數千里來未覩此景况也四圍林木葱蒨蒼松翠柏多百餘年物山石皆青鐵色道旁有毒泉飲之傷生立有禁碑行人戒之嵩明州楊林驛有楊升庵題詩處羣峰屏列有石如羊元時本名羊林後改爲楊林縣今改爲驛板橋驛詎省城三十餘里明沐英等征雲南帥至板橋進駐金馬山卽此地

七月三十日至滇省城住貢院內城內有五華山俯視昆明池據省垣之勝城外金馬碧雞二山相對五十餘里漢宣帝時方士言益州金馬碧雞之神可祀而至乃遣王褒求之是也滇池在城南延袤三百餘里一名滇海元至元中張立道爲雲南勸農使求泉源所出洩其下流得良田萬頃明傅友德沐英守雲南皆事屯田以資灌溉至今民受其利自入滇以來萬山之中林木甚稀論者以爲金沙江道塞不得下水以通川粵雖名章巨材千尋萬畝皆積於無用之地故民人不圖竹木之利前人屢議開金沙江然旋開旋塞非人力所能爭也城南五里許有近華浦建大觀樓於其上遠山環繞稻田千頃一水盈盈通滇池五百餘里登樓一覽金馬碧雞儼然對列真大觀也城東三十里有黑龍潭阮芸臺前輩謂漢書滇池之旁有黑水祠卽此潭左有方池水清而冽從池底噴出纍纍如貫珠謂之珍珠泉上有龍泉觀有古梅一株老枝斜臥瘦條特出冬季花發於老幹上相傳爲唐人所植院中古柏參天盤根鬱結土人指爲宋柏以余觀之未必眞爲唐爲宋然皆數百年物矣泉水繞其下長流數十里外爲稻田灌溉之需所可異者龍潭水近赤龍泉水濁而珠泉水獨清咫尺之際絕不相淆其源固自不同耳制軍署中有老梅四十餘株優曇花枝幹青葱已成大樹其餘花木濃陰茂密亭榭池沼俱覺幽勝亦不可多得之境黔苗種類

甚多大約皆垂髻垢面以青布帕裹髮高盤額上男女皆多跣足走險初涼時有加以風帽者亦有如道士方冠者究莫辨其爲何種也滇省猥猥之屬多有在各衙門充當書吏者其明敏勝於漢人滇中花四季皆開如香櫟佛手之類較他省爲最大然俱無香其氣洩而不斂故也黔省道旁多野生刺梨味甘而酸食之能消悶又有叢生紅果似天竹果相傳武侯征蠻時山谷間多生此以充軍食土人謂之救軍糧又有幹葉似雞冠花細穗長尺許多紫黃二色詢之土人葉可爲菜穗可爲餅名爲天生米有細莖小葉花似水仙者名爲野蓮與救軍糧沿途滋生紅白相間亦自可觀余素性不嗜薑以其性暖也入黔以來每飯必有醬薑食之頗覺相宜蓋山泉水性最寒故辛烈爲宜黔人每食必有紅椒職是故耳

九月初八日自黔省啟程

十四日至鎮遠府由灘河舟行前此河水甚淺抵鎮遠時因連日得雨水長四五尺可以行舟然水小灘大上下甚險是夜大雨達旦迨登舟時水長丈五尺許順流而下絕無險阻至沅州見楊太守鎮源云前日水長丈餘固利舟行現在水落數尺尤爲平順否則水勢過疾建瓴而下尤可畏也六日而至常德向未有如此之順且速者至常德聞澧州公安一帶驛路水尚未涸仍由前來水路而行又慮湖口水淺不能前進適楚北委員來詢知卽由水路而至遂定於次晨啟程無庸易舟自鎮遠登舟後細雨斜風輕舟迅疾至武陵天氣晴朗又得順風六日而抵荊州沿途漫水漸涸兩岸丹楓黃葉竹塢柳林紅綠相間居民廬舍歷歷在目又非復去時景象於十月初九日行抵楚北省城從此輕車熟路盡入坦途矣此次奉使滇黔天氣炎熱山路崎嶇途中因江水漫溢舍驛登舟諸邀順利差免艱辛深堪誌幸

安陽居民於罾井中得一卵大可容數升重廿餘斤其殼青色有紋如螺明之經經作石聲或曰此蛟卵也

雲南蠻民雜處其類不一最熟者爲獯獯其俗男女皆蓄髮赤足能華言婦人以黑布或藍布裹首長六七尺雖盛夏不去處女則垂雙髮辮於兩肩負擔貿易婦女居多肩輿服牛乘馬千里之役往往有之滇人載物馬騾外往往以負其法以巨索縛物索端以椶皮織數層如繒闊三寸許戴額間負手承物僂僂行少憩卽倚物而坐雖大木巨石亦用此法豈其額多力異於他處邪

滇省多山產石郡邑城郭悉以巨石壘成中灌桐油石灰堅固逾城輒什伯倍

於友人處見琥珀一塊大如拳色如火內有螻蛄數枚蠕蠕上下或云蟻食其中松脂得不死者常沾人氣血脂可不竭李子友云曾於永昌見一珀內有小蜈蚣亦然但彼係金珀尤極清楚耳

大理西門外去點蒼山麓僅三里許每年三月中旬夷民苗獯及各土司部落咸集苦蓋草竹布寮延袤數里貿易輻輳牽車牛而服賈者不遠千里其所買賣皆珍異之物如寶石琥珀翡翠瑪瑙車渠赤金珍珠風磨銅緬錫緬錦法琅走烏白銅象牙象尾五色石其鳥獸則孔雀錦雞鸚鵡秦吉了桐花鳳鸞麝香狸獐兔之屬入其市珍奇不一貨與人日以萬計提督撥兵邏守當事亦日蒞焉

滇中繡球紅白者極盛有淺紅木本者花與葉大不過如小胡桃向陽成深粉紅色置之背陰處一二日卽變爲翠羽色非青非藍花光照人土人亦極貴重呼之曰翠核桃其葉大而花繁者則彌滿山谷矣梅花一似吾鄉但不需培植且早且久蓋南中地氣溫暖故其花薔易發

桂有三種曰銀曰金曰丹丹者香冽更甚七月初卽放花落蕊生子可至十月府署中有四五本書室曰

學古山房庭心二樹尤極叢茂余嘗謂曼卿生香不斷之句洵於此數十日中遇之

大理襟山帶河山珍多而水族殊鮮工魚產洱河中最有名然不甚適口無螭螭夏秋間有螭螭醉以椒酒差可供咀嚼耳

用巨鉞鉞螺螄口門卽有白漿流出漚入沸湯中勻圓瑩潔大如芡肉土人以之調入羹湯鮮美異常第不堪多煮恐失其脆嫩耳

黃果大如柑味美產浪穹縣者尤佳柚子大七八斤甘香如佛手而皮不苦辣佛手柑極大而不腐敗久則乾枯西瓜產金沙江色如硃砂花香異常其餘果蔬大略與吾鄉相彷彿

洱河東玉案山正對河西浩然閣磨崖刻曰此水可當兵百萬昔人空有客三千不知所云及見宋詩紀事載梅磳詩話云江陰乃春申君舊封浮遠堂瞰江對淮爲一郡佳景李鶴田題一聯云此水可當兵十萬昔人曾有客三千不知何人移刻洱河按李名鉅字元暉吉水人宋末官閣門宣贊舍人年八十九有雜著四集錢塘百詠行世

浪穹縣鳳羽山俗傳鳳凰死每歲八月間必有異鳥百千爲羣啁啾翔鳴七晝夜方散亦一奇也

俗又名鳥甲山

英二月十五日即華正月初十日在緬甸邊界地方名四角大浜河邊起程已與土酋商定令其引路將土酋親戚人留在緬甸後路爲質以備不虞除印度兵十五人外緬甸王又撥兵一百五十人爲之保護印兵所執兵器精良緬人所執不過足以傷人如短刀火石鎗之類第一日約行十里皆係田畝之地至葛金山住宿

十一日行山路四十餘里至緬甸王所建第四號驛站房先問路客云從莫美來知中國有兵四百名要到滿園地方來抗拒探路之員引路土酋曰應著人去探後商量安當明日到第五號驛館停住發馬加利到滿園打聽此事如有意外之變從速回來

十三日行九里至第五號驛館此處有一小澗名南浜係中國與緬甸分界之處是時聞留緬後路爲質之人已經逃去又昨日馬加利同一中國之先生此人十分溫雅見重於西人又帶細崽差役廚子馬夫各一人登程先發馬加利心中毫無疑懼以爲中國抗拒一事斷乎無之即各探路西員亦坦然無慮料中兵四百名或是迎接而來是夜接馬加利信知並無抗拒一事即擬赴滿園

十五日各員起程山路崎嶇約行二十四里至山巔計比海面高者五百五十丈山風凜然四面怒號又多林莽深密之處是夜又聞中兵要來圍攻所聞兵數亦愈多矣

十六日又行至一地名沙來離昨宿處二十四里沿途平安因同是處土酋商量在一所木房暫歇此土酋土名沙白亞如地甲之類進此木房房長二百尺一邊是屋一邊如穿堂一帶中有一火鑪而無出煙處因此煙煤腌臢又無窗牖啟閉土酋說馬加利已平安過去緬兵如害怕不行我可帶領前往隨便何時信致馬加利可也余等因看此土酋言語形容都有可疑雖相待殷勤而中懷不測首員白郎遂定見小方壺齋與也叢鈔

仍回昨夜所宿之處且因行裝未帶只得離開另走土酋又言如見中國兵不必驚疑彼此原是和好等語是夜回至昨宿之處見二人頗觸目緬兵見之尤膽怯然並無事

十七日八點鐘有農人來言馬加利及跟從人等均已被戕莫美已發兵三千知會昨來之土酋及另一土酋相約圍攻業已不遠正在猜疑忽山嶺上已有多人知事危險遂預備抵禦將緬兵分爲哨探又令保護後路印兵伏在巖石之後準備方安中兵已來伏長草內有數人在小路搖旗高喊又謂緬兵曰我等非打緬人僅殺番鬼是時印兵放鎗技熟器良中兵雖多竟躲身山石不能進前有時出頭喊望即被印兵鎗擊中兵亦卽心怯各鳥獸散并見其多人受傷又遺一尸緬兵見之遂各擁出割其首級回營置地上圍繞而觀羣相歌舞旋復攜挂樹上大聲喊詈曰所不退避而抗拒者有如此首吾緬兵非常人乃緬王屬下之士卒也喊詈之後伏長草之中兵又出施鎗而器甚不精只傷一緬人一印度從人而已又越時許中兵援至然未嘗敢近也方接仗時有土酋名魯溫科者對白郎言昨來土酋係得中國所許印度銀五百故幫中兵打西兵白郎會意謂曰爾如幫我將各人及行裝護送回去給爾印銀一萬如何土酋聞言大喜遂領各部下人放火焚草風順火烈煙燄蔽天中國人乃始敗績竄出離探路員所在不過八百步印兵復放鎗中兵中鎗傾跌者又有多人至四點鐘事始完畢遂將行裝安於驛背肅靜而走以印兵精幹者爲殿其時緬兵尙無歸意若欲示威於中國再奏凱歌舞蹈而行似謂中兵四面來攻渠等亦能抵禦然緬兵雖趾高氣揚外強中怯而於是役也亦十分相助矣正在收軍而歸貪銀之士酋又復自放一鎗於草際中與不中未嘗知之而自謂已殺一人也行十里至一小城名西邸緬兵欲宿於此白郎見林深樹密遮蓋四圍設中兵來伏莽中正無抵禦遂定見回南浜住宿該土酋將緊要行裝各物均妥貼裝送卽與印銀一萬又云其蟲重什物當再送來明日到後說後邊又有中兵追趕倘被趕上蟲重

之物均要遺失又同一客居滿園之緬官來說中國作難之意馬加利已被戕殺要探路員自己作主等語言畢卽去嗣後又經兩日回到白木一路安帖行裝等物均經土酋護送現在得確實信聞莫美已發三千兵係中官姓鳳者統帶內副將一員名李詩曾發令不分英國印度緬甸人及跟從等均須殺卻也莫美中官如廳州之職非十分貴顯大約總有指使抑有恨西人之有權者授意作此或云馬加利於十四日到滿園十五十六兩日在該處地方遊玩頗覺快意與居民敘話亦覺無猜至十六日夜有中人給其視熱水井甫欲上馬被其人從背後用刀殺害并將隨從諸人盡殲之止有一廚子得脫首級旋懸城上號令查馬加利從漢口到緬甸一路各官均極相好雲貴督憲特派一武弁送到邊界所過地方官員迎接款留相待殷勤到莫美時李詩相遇亦備優禮且其未登程之先曾告各探路員曰今回莫美可使訪李詩也現各員跟從之人不知下落者有一緬甸人又一上海人名石雨田係英員亞倫所帶去者因此人在後故無信息續有從雜納地方來者云有中國人被殺在彼想卽係石雨田矣

或云俞福田

滇遊日記

錢塘包家吉著

龍飛光緒紀元歲次乙亥七月上浣居停陳君寶渠福勳蒙○○欽差查辦雲南事件湖廣總督部堂李瀚章奏調隨滇辦事初七日接奉蘇松太道憲馮煥光行知初九日交卸會審事務

初十日余自湖北至上海

十一日乙巳晴午刻居停赴道轅辭行戊初一刻偕余及通事趙錦榮科房方祥芝家人李敬莊春共上下六人攜帶行李乘坐旗昌洋行之徽州輪船船主名魯美國人執事施子卿司帳朱西亭俱湖州人送行諸君江干話別無任依依是日天氣炎熱寒暑表升至九十度矣

十二日丙午晴寅正動輪卯正出吳淞口天氣晴朗水波不興北望汪洋渺無邊際午正過狼山遙遙與對江福山兩雄相峙直長江之要隘酉初過江陰遙望山之陽夫役擔泥負石經營礮臺想爲江防起見十三日丁未晴卯初行抵鎮江北固山下暫泊仰望甘露寺居山之巔山下江流甚急金焦兩山東西對峙辰正復起棹上駛已正過儀徵縣屬之十二圩數里帆檣如星羅碁布係湘鄂皖西四岸鹽商輻集之所也未正三刻抵金陵北城外之下關暫停戊初過采石磯山之陰有亭翼然係好事者爲之稱說卽當年李青蓮之捉月亭也亥初一刻至皖省之蕪湖縣江北岸有廟巍然相傳梟姬廟卽三國時孫夫人祠也

十四日戊申晴卯正二刻過大東鎮又名荷葉洲亦是巨鎮遙望九華山峰螺九點雲霧迷離已初過函音山未正抵安慶卽安徽省垣也遙見問津輪船泊於西城外是日午後天氣炎熱寒暑表已升至九十

五度矣戊初一刻過東流縣戊正三刻過望江縣之華陽鎮亥初二刻過馬蕩峽亥正三刻過小姑山高峰獨聳孤立江中右挾皖省之宿松左臨江右之彭澤山上建小姑廟飛閣流丹下臨無地江流急湍與